



Inatsisartunut ilaasortaq
Anton Frederiksen
Partii Naleraq

§ 37 naapertorlugu apeqqummut 2015-imi nr. 216-imut akissut.

Asasara Anthon

Nunatsinni sanaluttartut qinnuteqaateqarnissamut periarfissaat pillugit apeqquinnut ataani akineqartunut Naalakkersuisut sinnerlugit qutsavigaakkit:

1. Nunatsinni assassorlutik kusanartuliortartut (eqqumiitsuliortut), nunani issittuni eqqumiitsuliortut suliaminnik saqqummersitsinissaannut peqataanissamut tapiiffigineqarsinnaappaat?

31-08-2015
Sagsnr. 2015-8378
Dok. nr. 920087

Postboks 1029
3900 Nuuk
Tlf: +299 34 50 00
Fax: +299 32 20 73
Email: iiknn@nanoq.gl
www.nanoq.gl

Akissut:

Aap tapiiffigineqarsinnaapput. Eqqumiitsuliortut sanaluttartullu nunatsinni nunanilu allani saqqummersitsinissaat pingaaruteqartoq Naalakkersuisut isumaqatigaatsit. Ilisimatitsissutigisinnaavara kalaallit eqqumiitsuliortut, kulturimik ingerlatsisut peqatigiiffiillu eqqumiitsuliortunut maani najugaqartunut Naalakkersuisut tapersiinissamut periarfissaat arlallit atorluartartorujussuugaat. Tapersiinissamut aaqjissuussinerni eqqumiitsuliortut sanaluttartullu nunat tamat akornanni peqataanissaannut periarfissineqarput.

Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmi aaqjissuussinerit eqqumiitsuliortartunut tunngasut inatsisitigut ukuninga tunngaveqarput:

Kulturikkut ingerlatsineq sunngiffimmilu sammisassaqaartitsineq pillugit Inatsisartut peqqussutaat nr. 10, 21. maj 2002-meersoq kiisalu Aningaasanoorutit ilaannit iluanaarutinit agguaassisarneq pillugu Inatsisartut Inatsisaat nr. 10, 22. november 2011-meersoq, pulje C suliniutinut aningaasat.

Inuussutissarsiornermut, Suliffeqarnermut Niuernermullu Naalakkersuisoqarfik apeqqummut tunngatillugu imatut ilisimatitsivoq:

“Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat nr. 20, 3. december 2012-imeersoq naapertorlugu inuussutissarsiornermi suliniutit inuiaqatigiit aningaasaqarneranni pissarsissutaasinnaasutut nalilerneqartut taperserineqarsinnaapput. Tapersiisarnermi aaqjissuussinerit ”Tunisassanik ineriartortitsineq” aamma/imaluunniit ”ingerlatsinerit avammut tuniniaanermi siuarsaataasinnaasunut tapersiinerit” ”nunatsinni sanaluttartunut” tunngatillugu naleqqussinnaapput.”

2. Taamaattoqarsinnaapput sumut saaffiginnissinnaappat?

Aningaasanut inatsimmi kontomi pingaarnermi 40.95.01 Eqqumiitsuliornermut kulturimullu tapiissutit allat, kulturimut aningaasat sanaluttartunut inuussutissarsiutugalugu sanaluttartunut tapersiinissamut periarfissiipput. Najoqqutassiat aamma ataani taaneqartut naapertorlugit ukiumut marloriarluni 15. september aamma 15. februar qinnuteqartoqarsinnaavoq. Eqqumiitsuliornermi ineriartortsinermit itisilerinissamullu eqqumiitsuliortut sulinissamut aningaasaliiffiqeqarnissamik 15. maj aamma 15. december qinnuteqarnissamut periarfissaqarput. Kulturimut aningaasanut najoqqutassiat qinnuteqarnermilu immersugassaq pillugit paasissutissat annertunerusut uani takuneqarsinnaapput www.sullissivik.gl .

Inuussutissarsiutugalugu ingerlatsinerit pineqarpata aningaasanik tamat iluaqutissaannut Naalakkersuisunit tunniunneqartartunit agguanneqartartunit qinnuteqarnissamut periarfissaqanngilaq. Sanaluttartuq sanaluttarnerminut atatillugu tamat iluaqutissaannut siunertaqaruni Aningaasanoorutit ilaannit iluanaarutinit agguaassisarneq pillugu Inatsisartut Inatsisaat nr. 10, 22. november 2011-meersoq, pulje C suliniutinut aningaasat aamma nalunaarut nr. 2, 26. januar 2015-meersoq naapertorlugit qinnuteqarsinnaavoq.

Najoqqutassiat qinnuteqarnermilu immersugassat pillugit paasissutissat annertunerusut uani takuneqarsinnaapput www.sullissivik.gl .

Apeqqummut tassunga akissutitut Inuussutissarsiornermut, Suliffeqarnermut Niuernermullu Naalakkersuisoq nalunaarpoq Naalakkersuisut Greenland Business A/S-imut tapersiisarnertit pillugit qinnuteqaatinik suliarinnittartumut isumaqatigiissuteqarnikuusut. Soqutiginnittut paasissutissat annertunerusut siunnersorneqarnissarlutit pillugit suliffeqarfimmut saaffiginnissinnaapput.

3. Saqqummersitsinernut assisiinngitsunut nunarput sinnerlugu peqataanissamut qanoq allanik periarfissaqarput?

Sanaluttartut nunanut avannarlernut tunngatillugu NAPA Nordens Institut-imut atassuteqarnissamut periarfissaqarput, tassanilu sunik periarfissaqarnerlutik siunnersorneqarsinnaapput siunnersuutinillu pissarsisinnaallutik. Kalaallit Nunaanni Nordens Institut NAPA tassaavoq eqqumiitsuliornermi kulturimilu ingerlatsisut Kalaallit Nunaata avataani ingerlatsinissaannut aqutissiuisartuq. Paasissutissat annertunerusut pillugit una takuuk www.napa.gl.

Danmarkimut tunngatillugu nunap immikkoortuini periarfissat pillugit Kalaallit Illui isumasiornissaannut periarfissaqarpoq. Nunanut tamanut tunngatillugu Danmarkip nunani allani sinniisoqarfii 105-it attavigineqarsinnaapput, takuuk www.um.dk sinniisoqarfiit ataanni.

Inussiarnersumik inuulluaqqusilluta

Nivi Olsen